

أنا قرفت من الحب . . وتقول أن الحب ده عاوز واحد
فاضى . . والمشغول ما يقدرش يحب . . واللى يحب ما يقدرش
ينشغل بحاجة تانية . . مش ده كلامك بعظمة لسانك . .

هو : فكرتيني . . والنبي عضمي وجعني من الرمل . أنت
يا أخ ياللى هناك . . أنت يا بتاع التين ! . تعالى خد أيدي . .
أيوه لازم واحد تاني ياخذ أيدي . .

هي : هنرجع للنغمة القديمة . . واحد تاني ياخذ أيدي . .
واحد غيري . . أنا ما أقدرش أعمل لك حاجة أبدا . . أنا عارفه . .
وده اللي بيخليني دائما أسألك . . تفتكر أنا أقدر أسعدك ؟ . .
هو : ممكن . .

هي : ممكن أزاى . . إذا كنت أنت مش عاوز تبقى سعيد . .
أنت معذب نفسك . .

هو : أيوه أنا معذب نفسي . .

هي : معذب نفسك أزاى ؟

هو : معذب نفسي زي أنت ما بتقولى . .

هي : يعنى أيه ؟

هو : يعنى زي أنت ما بتقولى . . وإلا أنت بتقولى كلام
مش فاهماه . .